


PENGENALAN

Majlis Optik Malaysia (MOC) bertanggungjawab mendaftarkan optometris dan juruoptik, memantau perkhidmatan dan amalan optometri dan juga membuat penilaian serta pengiktirafan terhadap Program Optometri dan Opticianri yang dikendalikan oleh Pemberi Pendidikan Tinggi (PPT) di Malaysia. Amalan optometri telah diiktiraf sebagai perkhidmatan perlu (*essentialservice*) oleh Majlis Keselamatan Negara (MKN) semasa pelaksanaan Perintah Kawalan Pergerakan 2.0 (PKP). Sehubungan itu, MOC turut terlibat membangunkan Prosedur Operasi Standard (SOP) di bawah sektor Kesihatan bagi amalan optometri di premis optikal. SOP sentiasa dikemaskini mengikut situasi semasa negara.


AKTIVITI DAN PENCAPAIAN

SEKTOR PENDAFTARAN DAN PERAKUAN PENGAMALAN TAHUNAN (APC) PENGAMAL OPTOMETRI

Jawatankuasa Penilaian MOC bertanggungjawab dalam perkara yang berkaitan dengan pendaftaran dan perakuan pengamalan tahunan. Sebanyak empat (4) kali mesyuarat diadakan yang melibatkan penilaian permohonan pendaftaran baru pengamal optometri. Rajah 1 menunjukkan bilangan pengamal optometri yang didaftarkan dengan MOC bagi tahun 2021. Rajah 2 menunjukkan statistik pembaharuan APC bagi tahun 2017 hingga 2021. Mesyuarat MOC bil. 1/2021 telah bersetuju PQA bagi juruoptik diadakan bertujuan mendaftarkan graduan bidang opticianri yang tidak tersenarai dalam Jadual 1 Akta Optik 1991. Ia akan dikendalikan oleh Pertubuhan Akademi Optometri Malaysia (PAOM).



Sumber: Laporan Aktiviti MOC 2021, Unit Pendaftaran MOC



Sumber: Laporan Aktiviti MOC 2021, Unit APC MOC

SEKTOR PENGIKTIRAFAN DAN PENTADBIRAN

Mesyuarat Jawatankuasa Teknikal Pengiktirafan (JTC) MOC telah diadakan sebanyak dua (2) kali sepanjang tahun 2021. Penilaian pemantauan program sepanjang tahun 2021 dilaksanakan secara *virtual audit* (MQAVA) menggunakan medium aplikasi Zoom yang diuruskan oleh pihak MQA. Hanya 1 penilaian pemantauan akreditasi penuh program dapat dijalankan disebabkan kekangan yang berlaku akibat pandemik Covid-19. Sektor ini juga telah berjaya membangunkan dokumen program standard dan garis panduan kelulusan akreditasi program optometri/opticianri 2.0 berdasarkan COPPA 2.0 dan MQF 2.0. MOC telah mendapat kelulusan pihak MQA sebagai pusat bagi pelaksanaan “Accreditation of Prior Experiential Learning for Credit Award” [APEL(C)] kepada Juruoptik Berdaftar bagi kemasukan ke program Optometri (*Accelerated*). Ia berkuatkuasa dari 1 Jun 2021 hingga 31 Mei 2026. Taklimat awal bagi pra-penilaian APEL (C) kepada 22 orang calon telah diadakan pada 5 Oktober 2021.

SEKTOR ETIKA DAN AKTA

Sektor ini bertanggungjawab ke atas pelaksanaan gubalan Rang Undang-undang Optometri, pewartaan pindaan Jadual Akta Optik 1991 dan Peraturan-peraturan Optik 1994. Gubalan Rang Undang-undang Optometri masih di peringkat semakan oleh Cawangan Perundangan Perubatan. Regulatory Impact Statement (RIS) untuk Regulatory Impact Analysis (RIA) juga di peringkat semakan kali kedua oleh Malaysian Productivity Corporation (MPC).

Sebanyak 22 kes aduan yang diterima sepanjang tahun 2021. Kes aduan yang tertinggi adalah berkaitan ketiadaan optometris atau juruoptik dengan permit kanta lekap di premis optikal (10 kes). Kes yang melibatkan penjualan secara dalam talian juga banyak diterima. Sehubungan itu, satu garis panduan telah dikeluarkan dan diedarkan kepada semua agensi yang terlibat. Sebanyak 8 kes yang diadu telah dapat diselesaikan. Terdapat tiga (3) garis panduan yang dikeluarkan bagi memastikan amalan optometri yang dijalankan mematuhi akta dan kod tataamalan yang sedia ada :

1. Garis Panduan Penjualan Alatan Optik dan Kanta Lepak Secara Dalam Talian
2. Garis Panduan Perkhidmatan Komuniti Optometri (Anjuran Badan Bukan Kerajaan [NGO] dan Pengamal Optometri Swasta)
3. Garis Panduan Perkhidmatan Optometri Mudah Alih (*Mobile Optometry Service*)

Perancangan untuk menjalankan Audit Surveilans Optik pada tahun ini ditangguhkan ke tahun hadapan bagi mematuhi PKP dan SOP yang dikeluarkan oleh MKN. Pada peringkat awal PKP dilaksanakan, premis optikal turut tidak dibenarkan beroperasi. Setelah mendapat pengiktirafan sebagai perkhidmatan perlu di bawah Sektor Kesihatan, perkhidmatan optometri telah dibenarkan beroperasi mengikut kategori di dalam SOP bagi Pelan Pemulihan Negara (PPN). Sektor ini turut bertanggungjawab dalam menyediakan dan mengemaskini SOP tersebut.

SEKTOR KOMPETENSI

Peperiksaan Kanta Lepak (Teori dan Amali) bagi Juruoptik Berdaftar di bawah Seksyen 30(5) Akta Optik 1991 yang dirancang pada tahun ini telah ditunda ke tahun 2022 disebabkan pematuhan kepada SOP yang telah ditetapkan oleh MKN dan KKM.

Semua pengamal optometri disarankan untuk berdaftar dalam sistem myCPD. Terdapat peningkatan iaitu sebanyak 44.1 peratus (%) daripada jumlah pengamal optometri telah berdaftar yang mewakili seramai 1647 pengamal sektor swasta dan 364 pengamal sektor awam. Sebanyak 137 permohonan mata CPD telah diterima daripada penganjur program iaitu 8 permohonan secara manual dan 129 permohonan melalui sistem myCPD. Kebanyakan penganjuran program bagi CPD tahun ini adalah secara *online*. Ini adalah seiring dengan pematuhan SOP pandemik Covid-19.

OBJEKTIF KUALITI

Dua (2) objektif kualiti yang telah ditetapkan telah tercapai bagi tahun 2021 iaitu:

1. 98 peratus (%) APC dikeluarkan dalam tempoh 14 hari bekerja daripada tarikh penerimaan permohonan yang lengkap – pencapaian 100 peratus (%).
2. 90 peratus (%) surat menyurat berkaitan akreditasi program yang tidak melibatkan pihak ketiga dikeluarkan kepada MQA dalam masa dua (2) minggu selepas Mesyuarat JTC

– pencapaian 100 peratus (%).

KESIMPULAN

Secara keseluruhan, terdapat beberapa perancangan aktiviti MOC bagi tahun 2021 tidak tercapai dan ditangguhkan bagi mematuhi SOP yang telah ditetapkan oleh MKN dan KKM.

PENYELARAS & PENYUMBANG

PENYELARAS

1. Puan Ilyana Binti Rosli

PENYUMBANG

1. Puan Juhaida Binti Zahri
2. Puan Sulastrey Binti Mohamed
3. Puan Najihah Binti Muhamad Sharif
4. Puan Julierozaida Binti Jamaludin